


TEZAU LITURGIC
16 SEPTEMBRIE

SLUJBA
SF. CUVIOS-
MĂRTURISITOR
KUKȘA
VELICIKO
DE LA ODESSA



SLUJBELE SFINȚILOR ODESSEI
ODESSA, 2009



Служба преподобному Кукше Одесскому, исповеднику

НА ВЕЛИЦЕЙ ВЕЧЕРНИ

На Господи, возвах: стихирьы, глас 1.

Подобен: Небесных чинов:

Приидите, православных собори, / воспоим
ныне преподобнаго Кукшу, / чудотворца
дивнаго и теплаго о нас молитвенника, / и
усердно возопиим ему: / вознеси, преподобне
отче, молитву, / да помилует нас Господь, // яко
Един Благ и Человеколюбец.

Приидите, монашествующих лица, / восхвалим
днесь дивнаго подвижника, / и, подражающе
того подвигам и смирению, / любовь величаем
преподобнаго, / и усердно возопиим к нему: //
моли о нас Единого Человеколюбца.

Приидите, боголюбцев множество, / с радостию
воспоим преподобнаго, / величающе подвиги и
труды его, / лобызаем святая мощи, вопиюще: /
моли, отче преподобне, Христа Бога, / да спасет
люди Своя, // яко Един Благ и Человеколюбец.

Приидите, людие православнии, / поклонимся
дивному чудотворцу и новому исповеднику, /
преподобному и богоносному отцу нашему
Кукше, / светильнику Отечества нашего / и

украшению земли Одесския, / и сему пение
принесем, зовуще: / моли о нас, старче
предивный, // Единого Человеколюбца.

Иныя стихиры, глас 2.

Подобен: Киими похвальными:

Киими духовными песньми / воспоим
преподобнаго Кукшу, / терпения проповедника,
новомученика и исповедника. / Той бо всех нас
научает скорбей безропотному терпению / и
добровольному крестоношению, // и молится о
нас ко Спасу душ наших.

Киими доброславными словесы / похвалим
подвиги преподобнаго: / в скорбех - терпение,
во искушении - крепость, / в труде -
послушание, / в молитве - Богу предстояние; / и
того величающе, / в Православии утвердимся, /
прославляюще Господа Человеколюбца, //
дивнаго во святых Своих.

Киими похвальными венцы венчаем
преподобнаго, / от юности мира лукаваго
отвергшагося, / древним отцем подражателя / и
подвигов их ревнителя, / старца дивнаго и
богопросвещеннаго, / неленостнаго
проповедника и духовника нелестнаго; / и сего
ублажающе, Господу поклонимся, // дивному во
святых Своих.

Киими песненными добротами / воспоим

преподобнаго Кукшу, / Одесския земли
украшение / и Успенския обители честную
похвалу, / той бо демонския козни попра, /
божественною благодатию укрепляем, / новый
исповедник и дивный молитвенник явися, / и
ныне молит о нас Господа, // дивнаго во святых
Своих.

Слава, глас 6.

Подобен: Триневен:

Днесь радуются концы вселенныя, / днесь
веселится Русь Святая, / днесь ликует земля
Одесская, / днесь великое торжество и радость
веля всем православным: / новый бо
исповедник и чудотворец изрядный, / слава и
украшение Церкви Христовыя, / преподобный
Кукша, Престолу Божию предстоя, / молится ко
Творцу всех, / да помилует Отечество наше, /
простит нам грехи наша // и дарует нам прежде
конца покаяние.

И ныне, праздника, глас тойже:

Четвероконечный мир днесь освящается:

Или Богородичен: Кто Тебе не ублажит,

Пресвятая Дево:

Вход. Свете тихий. Прокимен дне. Чтения три.

Притчей чтение:

Память праведнаго с похвалами:

Притчей чтение:
Уста праведнаго:

Премудрости Соломоновы чтение:
Праведных души в руце Божией:

На литии стихиры, глас 1:

О дивное чудо, / зрим на тебе, преподобне, /
како во плоти сый, ангелом ревнуя, / страсти
попрал еси / и демонския козни смирением
твоим отгнал еси. / Сего ради тя ублажающе,
вопием: / моли о нас Господа Христа, //
подающаго нам велию милость.

Отче преподобне, / кто возможет поведати
подвиги твоя, / в темницах и узах мучение
мужественно претерпел еси, / мраз и глад ни во
что же вменил еси, / со апостолом вопия: вся
могу о укрепляющем мя Иисусе. // Егоже моли
спастися душам нашим.

Небесныя Силы удивишася, / зряще труды и
подвиги твоя: / сый бо един от земнородных, /
яко бесплотный ангел являешися, / узы греха
постом разрешая / и нмощь естества молитвою
превозмогая. / Сего ради и мы, яко свидетелие
чудес твоих, / с любовью вопием ти: / моли о
нас Христа Бога, // Кукшо, преподобне отче
наш.

Слава, глас 2.

Подобен: Доме Евфрафов:

Дивнаго тя обретше в бедах заступника / и в скорбех скорога помощника, / люди православнии к тебе притекают / и, припадающе ко святей раце мощей твоих, / со слезами молят тя: / вознеси, отче, молитвы твоя пред Престолом Божиим, / выну предстательствуя о нас, // да помилует Господь люди Своя согрешившия.

И ныне, праздника, глас тойже:

Ты мой покров державен еси:

Или Богородичен:

Единосущное Слово Отчее, / бытие всей твари подающее, / содела Тя, Богоблаженная, / Чистую Свою Матерь, // Живот миру источившую.

На стиховне стихиры, глас 5.

Подобен: Радуйся, Живоносный Кресте:

Ныне торжествует земля Русская, / ныне благодать на верныя обильно изливается, / ныне Церковь Небесная спразднует земной; / не оскуде бо преподобный в Руси Православней, / и ангельстии лица купно с земнородными / прославляют старца дивнаго, // той бо выну молит о нас Христа Жизнодавца.

Стих: Честна пред Господем / смерть

преподобных Его.

Ныне притекают люди православнии, / со
слезами припадающе / к цельбоносным мощем
богоноснаго отца нашего Кукши, / и тому со
усердием молящися, / приемлют
неоскудеваемую благодать, / юже по молитвам
преподобнаго // обильно низпосылает нам
Господь.

Стих: Блажен муж бояйся Господа, / в заповедех
Его восхощет зело.

Преподобне отче наш Кукшо, / вознеси
многомощную молитву твою / и, выну предстоя
престолу Божию, / испроси нам у Христа
Господа оставление грехов, // прощение многих
прегрешений наших // и велию милость.

Слава, глас 8:

Подобен: О, преславнаго чудесе:

Страна Российская проповедует терпение твое,
/ сего ради и мы, яко твердаго исповедника
ублажаем тя, / восхваляюще подвиги твоя / и к
раце святых мощей твоих припадающе, /
просим и молим тя: / моли спастися людем
православным, / да не погибнем во гресех, / но
присно прославляем Господа, // дивнаго во
святых Своих.

И ныне, праздника, глас тойже:

Егоже древле Моисей прообразовав собою:

Или Богородичен, глас тойже:
Безневестная Дево, яже Бога неизреченно
заченши плотию:

Тропарь, глас 4:

От юности мир суемудренный и лукавый
оставил еси, / Божественною свыше
просветився благодатию, преподобне, / многим
терпением во временней жизни подвиг
совершил еси, / темже источаеши чудес
благодать / всем с верою приходящим к раце
мощей твоих, // Кукшо преблаженне отче наш.

НА УТРЕНИ

По 1-м стихословии седален, глас 8:

Душу твою от страстей очистил еси, преподобне
отче Кукшо, и старец предивный миру явился
еси, сего ради тя ублажаем.

Слава, и ныне, праздника, глас 3:

Крест и смерть пострадати изволил еси:

Или Богородичен, глас 8:

Пресвятая Богородице, преподобных радование,
Владычице Державная земли Русския явилася
еси, темже Тя, ублажающе, вопием: моли
спастися людем Твоим, непрестанно Тя
славящим.

По 2-м стихословии седален, глас 6:

Свещу в молитвах пламенеющую зрим ты ныне,
преподобне отче, не оставил бо еси нас сирых,
но присно молишися спастися нам.

Слава, и ныне, праздника, глас тойже:

На древе, Спасе, крестнем:

Или Богородичен, глас тойже:

Всесвятая Богородице, Всемиловитая наша
Владычице, помози нам недостойным, Ты бо
Едину надежду имамы.

По полиелеи седален, глас 2:

Преподобне отче наш Кукшо, земли нашея
украшение и Церкви Русския похвало, горы
Афонския плод краснейший и града Одессы
священное сокровище, моли о нас Спаса душ
наших.

Слава, и ныне, праздника, глас 8:

В Рай мя прежде древо обнажи:

Или Богородичен, глас тойже:

Всемиловитая Госпоже, Дево Богородице,
огради нас честным Твоим Покровом и избави
нас от всякаго зла.

Степенна, 1-й антифон 4-го гласа.

Прокимен, глас 4: Честна пред Господем /
смерть преподобных Его.

Стих: Что воздам Господеви о всех, / яже
воздаде ми.

Всякое дыхание:

Евангелие от Матфея, зачало 43.

По 50-м псалме стихихра, глас 6:

Ангела земнаго и небеснаго человека, / твердаго
исповедника и старца духоноснаго, / учителя
покаяния и проповедника чистоты, /
преподобнаго Кукшу днесь радостно
прославляем: / радуйся, Кукшо блаженне; /
радуйся, многих на путь спасения наставивый;
/ радуйся, верным похвало и земли Российстей
утверждение, // молися о душах наших.

Канон праздника или Богородицы со ирмосом
на 6 и святаго на 8,
егоже краегранесие: Преподобнаго Кукшу
радостно величаю. Глас 6.

Канон святаго.

Песнь 1

Ирмос: Яко по суху пешешествовав Израиль:
Преподобне отче наш Кукшо, помози нам
немощным величати тя достойно и воспевати
подвиги твоя.

Родителей благочестивых плод достославный
явился еси, отче преподобне, сего ради тя
ублажаем.

Елеем молитвы от юности душу твою умастил
еси и учитель изрядный покаяния явился еси,
отче достославне, моли спастися душам нашим.
Богородичен: Покровом Твоим, Дево
Богородице, от всякаго зла огради души наша.

Песнь 3

Ирмос: Несть Свят, якоже Ты:

Отцев афонских последователь усердный явился
еси и подвигов их подражатель изрядный, сего
ради прослави Тя Господь.

Демонския немощныя дерзости невозмогша
победити тя, отче святыи, молитвою бо умною
вооружаяся, вся сия мужественно преборол
еси.

Огнем молитвы Иисусовы разжег еси сердце
твое и явился еси людям православным, яко
свеща во тьме неверия пламенеющая и путь ко
Христу показующая.

Богородичен: Богородице Владычице, не остави
ны во грехи впадшия, но молитвами Твоими
спаси души наша.

Седален, глас 4:

Старца дивнаго выну прославляй, душе моя,
тепल्या тому принеси яже от сердца молитвы, в
радости поюще того, присно бо молится ко
Спасу душ наших.

Слава, и ныне, праздника, глас 8:
Посреде Едема древо прозябе смерть:
Или Богородичен, глас тойже:
Пресвятая Дево, Мати Христа Бога нашего,
высши всея твари явилася еси и ангельских
чинов Честнейшая, молися Сыну Твоему
спастися душам нашим.

Песнь 4

Ирмос: Христос моя сила:

Не терпя враг спасения нашего в Горняя умнаго
восхождения твоего, отче преподобне, гонения
на тя воздвиже, ты же, яко воин Христов, вся
сия мужественно претерпел еси.

Афонских пределов твое оставление и еже в
Печеры Киевския вселение всеблагим
Промыслом Господним свершися, да явишися
проповедник покаяния и молитвы учитель
изрядный.

Горнему миру причастник явился еси и в телеси
сомолитвенник безплотным чином, сего ради тя
ублажаем.

Богородичен: Отчаго лона не Оставльшаго и во
утробу Твою, Пречистая, Всельшагося, моли
спасти от смерти души наша.

Песнь 5

Ирмос: Божиим светом твоим, Блаже:

Кто возможет изчести страдания твоя и терпение твое поведати, яко всех наветов диавольских победитель достославный явился еси, отче наш Кукшо.

Узилица скорбныя и дебри лесныя молитвою твоею освятишася, отче, и сею враг посрамлен бысть, тою же и мы от грехов очищаемся.

Кукшу преподобнаго прославляюще, подражаем того терпению, да молитвами его от грехов очистимся.

Богородичен: Шуия части избави нас, Богородице Дево, и части деснаго сопричтения сподоби на Страшнем Судище Христовем, да со всеми святыми прославляем Сына Твоего.

Песнь 6

Ирмос: Житейское море:

Убийцы и разбойницы, яко льви явишася, ты же, отче святой, Даниил новый показался еси, благодатию Божиею злобы посрамитель явился еси и о душах наших молитвенник изрядный.

Радости вечныя причастник явился еси, отче наш Кукшо, и вся скорби во уметы вменяя, Христа Бога воин добрый показался еси.

Авво досточудне, не остави ны, чада твоя, но молитвою твоею укрепи вся, да тою спасемся.

Богородичен: Древоу Крестным язву древною
исцели Сын Твой, Дево Чистая, тем Тя молим,
Владычице, вечных нас избави мучений
предстательством Твоим.

Кондак, глас 8:

Подвижника благочестия искусна, / новаго
исповедника веры отеческия / преподобнаго
Кукшу верно вси ублажим, / яко пастыря
истиннаго, старца благостнаго, / иноков
наставника, утешителя малодушных, целителя
недужных, / и по кончине показующаго
светлость жития своего. / И днесь в память его
притекше, радостно возопием: / яко имея
дерзновение к Богу, / многообразных нас
избави обстояний, да зовем ти: // радуйся,
утверждение людем православным.

Икос:

Досточудне отче Кукшо, ублажаем тя, Небесных
Чинов сожителя и сонма преподобническаго
украшение; прославляем тя пророков
всеславных сотаинника; величаем тя, мучеников
и исповедников равностоятеля; поем тя,
Пастыреначальника Христа добраго
последователя; зрим тя, лика чудотворцев и
целителей благосердаго сопричастника;
песнословим тя, дерзновеннаго молитвенника о

Отечестве нашем и неусыпнаго ходатая о людех православных.

Песнь 7

Ирмос: Росодательную убо пещь:

Отец чадолюбивый и старец благостный явился еси, отче, яко чадом твоим путь спасения показуеши и к Царству Небесному приводиши. Старец духоносный, благодатию освящаемый, был еси и, к Небеси всех приводяй, сего ради не остави нас, чад твоих.

Таин Божиих провозвестник был еси, отче преподобне, вся ко спасению потребная верным открывая и к Царству Небесному путевождь являясь.

Богородичен: Игумение Всечестная земли наша, Всесвятая Госпоже Богородице, Ты Сама нас от всякаго зла огради.

Песнь 8

Ирмос: Из пламене преподобным росу источил еси:

Юродство мудрецам века сего есть жизнь евангельская, ты же, отче богомудре, обращая их, истинней мудрости научал еси.

Веселия вечнаго сладость еще сый в телеси предвкусил еси, отче преподобне, сея наслаждения молитвами твоими достигнути и

нас сподоби.

Естеством человек сый, житием ангел
являешься, и нас сподоби молитвами твоими
ликом небесным сопричастники быти.

Богородичен: Лицы ангельстии Тя, Чистая,
зряще, удивляхуся, како Дево и Богородица
являешься Херувим Честнейшая.

Песнь 9

Ирмос: Бога человеком невозможно видети:
Иноков наставник и ангелом сомолитвенник
явился еси, отче преподобне, предстательством
твоим спаси нас от бед и скорбей.

Чудотворец изрядный и бесов отгонитель, отче
преподобне, явился еси, не остави нас, помощи
твоя требующих, но заступи от сих молитвами
твоими.

Агнца Христа проповедник всем житием твоим
явился еси, отче наш Кукшо, Егоже умоли
спасти души наша.

Богородичен: Юже ангели непрестанно
славословят, Небесе и земли Царицу, Сию о нас
моли, отче преблаженне, да спасет удел Свой
земной - Русь Православную и помилует люди
Своя.

Светилен:

Ангела земнаго и небеснаго человека,
исповедника преславнаго и новаго чудотворца,

преподобнаго Кукшу ныне ублажаем и сего усердно просим: моли о нас Спаса душ наших.

Слава, и ныне, праздника:

Светозарными сиянии, Крест Господень на
воздвижение Его:

Или Богородичен:

Пресвятая Госпоже Богородице, всем сирым Помощниче и обидимым Надеждо, не остави ны, Твоя помощи требующия, но спаси от бед души наша.

На хвалитех стихиры, глас 2.

Подобен: Доме Евфрафов:

Веселися граде Одессо, / воспевая псалмы и песни духовныя, / радуйся, обитель Успенская, / имуще в себе мощи преподобнаго, / и выну прославляй дивнаго подвижника // и молитвенника усерднаго, той бо молится спастися нам.

Ныне притекающе к раце мощей твоих, / отче преподобне, просим и молим тя: / исцели язвы душ наших / и умасти я елеем молитв твоих, // да теми выну сохраняеми от всякаго зла, тя ублажаем.

Ныне торжествуют людие православнии, / дивнаго обретше тя чудотворца / и в скорбех скорога помощника, отче преблаженне, / и к тебе припадающе, просят тя: / вознеси о нас

святых твоих молитв, // да теми от всякаго зла сохраняеми, тя ублажаем.

Ныне светло красуется земля Русская, / ныне радостно вернии просвещаются / и веселием прославляют преподобнаго Кукшу; / той бо молитвенник изрядный о нас является / и дивный чудотворец, / сего ради ублажаем преподобнаго, // той бо молит о нас Господа Вседержителя.

Слава, глас б.

Подобен: Тридневен:

Ликуй ныне, богоспасаемый граде Одессо, / яко лучами солнечными просвещаемый чудотворным образом Касперовским; / се бо богомудрый Иннокентий / со твердыми во мучениих Анатолием и Григорием, / пречудный Гавриил-храмостроитель / и дивный в чудотворениих Иона / со преподобным отцем Кукшею, / яко звезды небесныя сияющи, / присно молятся спастися граду нашему // и всем верою живущим в нем.

И ныне, праздника, глас тойже:

Днесь происходит Крест Господень:

Или Богородичен, глас и подобен тойже:

В непреступнем Свете Живущаго / явила еси миру Творца Жизнодавца, / Богородице Чистая, / Того моли, Владычице, / с богоносным отцем нашим Кукшею, / да примет похвальныя песни

сия во славу Имени Своего Святаго / и
низпослет нам благодать неоскудную / усердно
работати и молитися Ему, // Дивному во святых
Своих.

НА ЛИТУРГИИ

Блаженны от канона, песни 3-я и 6-я.

Прокимен, глас 7: Честна пред Господем /
смерть преподобных Его.

Стих: Что воздам Господеви о всех, яже воздаде
ми.

Апостол к Галатам, зачало 213.

Аллилуия, глас 6: Блажен муж, бояйся Господа, в
заповедех Его восхощет зело.

Стих: Сильно на земли будет семя Его.

Евангелие от Луки, зачало 24.

Причастен: В память вечную будет праведник,
от слуха зла не убоится.

[Сборнику «**Службы Одесским святым**» (под
общей редакцией митр. Одесского и
Измаильского Агафангела; сост.: **архим. Тихон
Василиу, прот. Илия Тетерько, прот. Андрей
Николаиди. — Одесса: Издание Одесской
духовной семинарии, Астропринт, 2009]**